

Raajanut qaleralinnullu licensit killeqanngitsumik piffissalerlugit pigineqartarnerisa Aalisarnej pillugu inatsisartut inatsisaat nr. 18, 31. oktober 1996-meersoq § 14 naapertorlugu, ukiunik tallimanik sioqqutsisumik ilimasaaruteqarnikkut killilerneqartalersinnaanerit aningaasaqarnikkullu kinguneqaatissai ilanngullugit - Naalakkersuisut UKA2015-imi saqqummiussassamik misissuequllugit Inatsisartut peqquneqarnissaannik aalajangiiffigisassaattut siunnersuut.

(Inatsisartunut ilaasortaq Nikolaj Jeremiassen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

1. Siullermeerneqarnera

Naalakkersuisut sinnerlugit Hr. Nikolaj Jeremiassen aalajangiiffigisassatut siunnersuutaa pillugu qutsavigaara.

Raajanut, qaleralinnut aalisakkanullu allanut pisassiissutit inuiaqatigiinnut sapinngisamik iluaqusiinerpaanngorlugit tunniunneqartarnissaanik isuma Naalakkersuisut isumaqatigaat. Tassunga tunngatillugu ilisimatitsissutigisinnaavara massakut pisasseeriaaseq naapertorlugu raajartassiissutit qaleralittassiissutillu tunniunneqartut inuiaqatigiinni inuppassuarnut iluaqusiisarmata. Akitsuutit, akileraarutit ingerlatseqatigiiffiillu akileraarutaat aqputigalugit Nunatta Karsiata isertittagai amerlasuut iluaqusiisartorujussuupput, taakkulu pisassiisarnermut periutsit pitsaalluinnartut malitsigisaanik isertinneqartarput.

Ilu Moorpoq pingaartumik raajarniarnermi ineriartornerup kingunerisaanik raajarniarsinnaanissamut piginnaatitsissutit ingerlatseqatigiiffinit ataasiakkaaginnarnit pigineqalersimmata. Eqqartorneqarsinnaavoq taamatut ineriartorsimaneq eqqarsaatigalugu ingerlatseqatigiiffiit ataasiakkaat inituallaalersimanningsut aamma pissutsit taamaannerat inuussutissarsiummi equngasumik unammilleqatigiilersitsisimanersoq. Tassunga ilanngullugu pingaaruteqarpoq eqqartussallugu aalisartunngorniartut nutaat aalisarnernut aningaasartaqarnerusunut iserniartarnerat ajornarpallaalersimanningsut aamma taamaassimassappat qanoq iliortoqarsinnaallunilu iliortoqartariaqassanersoq.

Taamaattumik siunnersuuteqartup aalajangiiffigisassatut siunnersuuteqarnermigut anguniagai Naalakkersuisut paasilluarsinnaavaat, inuusuttummi ilaat inuussutissarsiutigalugu aalisartunngorusuttut raajartassiissutinik pissarsinissaminnut periarfissaqanngingajattarmata. Tamanna ajornartorsiutavoq siunissaq ungasinnerusoq eqqarsaatigalugu aaqqinneqartariaqartoq, aaqqiinissarlu aalisarnermi ataqatigiissumik politikksamut inuiaqatigiit aningaasaqarniarnerat eqqarsaatigalugu ajornanngippat iluanaaruteqarfiunerpaasartussamut aamma aalisariutit taarsersoqqinnissaat eqqarsaatigalugu pisortanit aningaasaliiffiunnginnerpaamik suliarineqartussamut ilaatillugu suliarineqartariaqarluni.

Tassunga tunngatillugu pingaaruteqarpoq eqqaamassallugu ingerlatseqatigiiffiit ilusilersorneqarsimaneri atorluarlugit piginnittut amerlineqarsinnaanissaat periarfissaqarmat, taamaaliornikkut assersuutigalugu inuusuttut aningaasaliissutissat amerlanerit eqqarsaatigalugit kattussuunermikkut aalisarnernut aningaasartaqarnerusunut isersinnaanngortinneqarsinnaapput. Taamaammat periarfissaq taanna misissuinissani aggersuni ilanngunneqartariaqarpoq.

Aamma eqqaamasariaqarpoq maannakkut pisassiissutinit pigisaqartut pigisaannut atatillugu inatsisitigut pisinnaatitaaffeqarsinnaammata, aaqqiivigineqartariaqarsinnaasussamik. Aalisarnermut inatsisissamik nutaamik suliaqarnermut atatillugu siunnersuutigineqartutut misissuisoqarnissaanik siunnersuuteqartoqarnera Naalakkersuisunit tunngaviusumik akerlerineqanngilaq. Inuussutissarsiut pineqartoq amerlasuunik aningaasaliiffigisariaqartarnissamik pisariaqartitsiviusarmat, aamma suliffissaqartitsiniarnermut, suliffeqarfiit ilaannut aningaasaqarniarnerinut kiisalu pisortat akileraarutit akitsuutillu aqputigalugit isaatitsisarnerinut pingaarutilerujussuummat, misissuinissap kissaatigineqartup aamma tamatuma kingorna kaammattuutigineqartut pitsaalluinnartumik peqqissaartumillu suliarineqarnissaat pingaarutilerujussuuvoq. Tamatuma saniatigut aalisarnermik toqqaannartumik toqqaannanngikkaluartumillu inuussutissarsiuteqartut akuutinneqartariaqarput.

Taakku akuutinneqanngippata siunissami aalisarnermut politikkissaq nalornissutigineqalissaaq, aningaasaliinissamullu periarfissat atorneqarsinnaajunnaarlutik, tassunga ilanngullugu avataaniit aningaasaliissuteqarsinnaanerit annaaneqarsinnaaneri inuiaqatigiinnut ajorluinnartumik kinguneqartumik.

Ataatsimiinnissami aggersumi aalisarnermut inatsisissamik tamakkiisumik Naalakkersuisut saqqummiussissamaarput, unalu apeqput aalajangiiffigisassatut siunnersuutitut saqqummiunneqartoq sulinerimi tassani ilanngullugu suliarineqarumaarluni.

Taamaattoqareeraluartoq Naalakkersuisut siunnersuut tapersorsorpaat innersuussutigalugulu siunnersuut akuerineqassasoq.

Taamatut naatsumik oqaaseqarlunga aalajangiiffigisassatut siunnersuut Inatsisartunut suliasanngorlugu tunniuppara.